

臺灣府志凡例合校

陳漢光

臺灣府志，有高修、周修、劉修、范修、余修五種，均有凡例，共佔原書篇幅二十一葉。茲合校分記之。

一、高拱乾 臺灣府志

凡例

一 臺灣自康熙二十年始入版圖其時諸公勞心草創於郡志未遑脩輯今人心已正文治漸敷欲同車書莫有大於此者但新闢殊方事多荒昧雖博採群言較諸郡守蔣公毓英所存草稿十已增其七八而才愧三長仍慮挂漏爰集守令師儒分曹校訂上自星野下至物產分爲十卷爲目八十中間規制官常一遵

王制言期取乎文事必綜其實獲免貽譏幸矣敢云得體乎哉

一 山川形勝所以設險固圉亦以領異標奇分野之後例首及之臺灣爲新闢海疆流峙異於中原雖詞客騷人未多登臨游泛之作而扞衛四省屹立大洋筆之于書匪特觀美故於海道三致意焉

一 規建官師衙署學校街坊類皆草創因仍至於城池雖載志目尚未肇建蓋城民禦暴藉百雉而益安崇墉長濠非數人所能任業已請之當事尙俟經畫

一 名宦鄉賢原以酬庸尙德臺雖新造後先君子人念甘棠但名位方隆功勳未竟欲崇長壘俟以他時

一 人材之興由於學校科名者學校之所爲光忠孝者科名之所由立也然士各有志而賢不一途長孺以質卽顯鄭侯以刀筆相安世以門廕侯庸功偉業彪炳天壤又豈盡出帖括乎哉臺之人物十年前無所表見故今所載自

國朝設科始先記其名徐觀其用

一 仲雍居吳斷髮文身裸以爲飾則自江以南古皆是俗也況臺灣乎及今觀之風俗人文惟南爲盛固不得以其陋而限之也子曰君子居之何陋之有作風土志以昇夫轉移風化之人

一 普天之下莫非王土君子于役不日不月租庸調者貢助徹之別名也臺之賦役與內地均別無希奇可以入獻亦曰無總于貨實生生自庸云

一 志載藝文務關治理苟有裨于斯郡宜無美而不收然考獻徵文前此遠在殊域揆天華國十年生聚方新今惟先集所見上自

宸章下逮新味（「周志」作咏）後有作者當俟之踵事增華

一 兵燹災祥古今多有臺灣孤懸海外始屬倭奴一變而爲紅彝再變而爲鄭成功今歸一統前此災異傳聞者聊書其概以備觀鑒非如齊諧志異也

一 網常長留天地忠義節烈者正以立天地之綱常也臺灣未入版圖之先蠢爾諸番曷知倫紀其自內地來此者始於明季之通商繼以僞鄭之俘掠前後生聚七八十年間有奇行可書大節難泯者得之傳聞務爲採入亦表揚幽隱風勵來茲之意

一 有文事者必有武備所以消反側靖人心也故居安慮危有備無患臺之武備設有十營水陸官兵萬人總干山立壯哉軍容至於軍器不登此書蓋示以

聖天子耀德不觀兵暗藏其用於神武而不可測孔子曰民可使由之不可使知之此志亦然

一 從來郡乘皆取裁于邑乘集其大而略其小臺係新創之區邑未有乘凡所收輯已覺無遺事分之愈覺其少合之不見其多故因地制宜捐俸自梓藏版于郡聊盡使者之責云爾

註：本凡例原書四葉，列載於次冊之首（「周志」列於首冊之中），

每半葉八行，每行二十字，字大約九平方公厘。

二、周元文 重修臺灣府志

凡例

——同「高志」——

三、劉良璧 重修臺灣府志

重脩福建臺灣府志凡例

一 臺自入版圖

許謨辰告遠

頒海外聲教之敷於斯爲盛茲編彙弁於首奉

詔諭爲一冊俾開卷者如親

典謨如覲

天顏以昭一道同風之治

一 舊志星野建置沿革山川疆界統歸封域茲各區其類而以形勝附

之使閱者瞭然爲海表中華得悉方輿之盛焉

一 城池官署學校舊入規制茲別輯城池爲一編重金湯也凡有關利

濟資保障者悉附及之以見苞桑之計

一 風俗關乎治化故語焉務詳附物產而并及氣候者以數十年來陰

陽調燮百物咸亨漸與中土無異於此悟

聖化轉移之權有天人協應之理

一 臺初賦役未備今則租庸日盛矣唯則例與內地稍異宜詳辨之并

言郵政者以海表窮黎獲沐

皇恩以見翔洽之意

一 典禮兵制前志俱未詳茲集禮文禮器及樂章悉本

會典內釐定成式駁駁乎祀事孔明矣若增設兵防允稱海東重鎮別爲一

編見武衛之盛焉

一 學校所以培養風教臺雖島域學則因地異名視內郡有加書院之

設尤屬

曠典若夫校士臨民義無偏重斯公署立焉宜各列爲一編

一 臺屬海疆要地官制故隨時屢易而名宦一冊苟非其人不敷濫予

廟食爲官方羞至云宦績方新且欲崇畏壘以俟來者

一 臺初學校未興故舊志以選舉附人物之後今別爲一編重科名也

若夫稟地靈而爲人秀稱三不朽豈易言哉間有取者亦善善從長

爾

一 臺地前爲夷島本無奇勝故古蹟一篇僅存其名若災異叢談亦以

示戒鑒資掌故也因博採之以備參考

一 舊志藝文頗繁今稍爲釐訂擇其愷切詳明有關政教風土者錄之

以資考鏡亦佐志乘所不逮焉

一 是編凡二十卷餘依類附入其體倣自省道志而略爲變通視之舊

志差信足徵矣至夫引用書目必詳姓氏于簡端亦示不掩人善之

義云爾

註：本凡例原書三葉，內半葉空白；列載於首冊之中。每半葉十行，

每行廿字；字大約八平方公厘。

四、范咸 重修臺灣府志

凡例十四則

一 郡志初作于康熙三十三年觀察高君拱乾成之其後副使劉君良

璧重修于乾隆六年高志草創多失之略至劉志則加詳矣然劉志

二十卷星野建置山川外更有疆域而物（「余志」作風）產即

附風俗下似爲不倫高志十卷以封域規制等爲十綱各附以目（

「余志」作口）序列有體今合新舊二志增損之爲綱十二爲目

九十有二庶幾有條而不紊爾

一 劉志大半撫拾通志如通志首列典謨蓋以全省所奉

諭旨高文典冊自宜弁冕簡端若郡邑志自不必複載舊志將

御製

至聖贊及表章朱子

上諭周易折衷等序並行纂述此豈專爲臺地而設耶且四亞聖贊後即繼

以

賜靖海將軍施琅碑文尤爲失次故茲志不敢仍襲其舊其有因臺郡事宜特頒諭旨者謹分載各條內俾奉行者有所遵守勿失焉

一 臺灣入版圖後生聚教訓雖歷六十餘年然猶去荒昧未遠本地苦無文獻可徵所見所聞不無異詞即以星野言之舊志謂屬牛女之分諸羅志謂屬翼九度而鳳山志辨其非必並列之以見統綱專主牛女之意是志於各條下俱列附考似于作志體例別創一奇亦以海外初闢之地不得不互存以資參覈云爾

一 前志于臺灣一邑祇載寥寥數山其羅漢門內外概不之及迨乙丑冬巡歷至其地見山谷盤互極險仄幽峻問之土人則云朱逆作亂時初皆盤踞於此及閱使檄錄載羅漢門山甚詳且云峻嶺深谷叢奸最易此守土者所不可不知也因採其語入形勝附考中而詳識其山之遠近道里補入山川志焉

一 鹿耳門爲全臺門戶防緝奸宄則臺防同知之責爲獨重前志不載海防事宜今特爲增入凡海港出入之要口及船隻之大小併一切見行則例俱必條列亦以見防海宜詳也

一 臺灣田賦自歸化後累蒙

列聖減則蠲除優恤備至惟雜稅有沿鄭氏舊名者故徵餉水陸異科與內地迥別其牛磨蔗車以及港灣潭塢繒繡罽毼蠶之屬非詳注則觀者無由知今特采諸書中言之雅馴者列之附考至養廉一項尤

聖朝體恤臣下之仁亦宜備載以志異數

一 臺郡分野揚州習俗尙鬼與荆楚同今典禮中祠廟一遵祀典所頒淫祠並黜其寺觀則別載雜記

一 閩省鄉試臺郡分額取中所以培養海外人才者備極隆至餘若粵人之附居者亦增入學名額尤爲

特典前志未錄故於學校中詳列其始末焉

一 海外武備特重凡分班遣戍之期道里舟車之費

歷聖加恩優恤至爲詳備而制田產以備吉凶賞恤延及百世尤我

世宗憲皇帝格外殊恩也舊志未載茲特補入並增列義民議叙一條以見

聖朝報功之典雖小善必錄焉

一 番社不下數百種生熟番馴頑不一南北番亦強弱各殊然熟番與土庶雜處輸賦供役則亦民也卽生番歸化亦各輸鹿皮餉今考其服食居處性習風尙各番略有不同因本黃玉圃先生番俗六考加以咨詢所及於風俗中分類詳記而其方言俚曲亦載其大略焉

一 臺之物產自百穀以至草木蟲魚類多中土所不常有在土人旣以臆名之而士大夫考據又苦未得其真故附考中徵引諸書有一物數見者蓋欲後人有所折衷故採擇不厭其詳至舊志所載如薤則云有赤白二種蒜則云有大小種桃則云花紅實可食梅則云味酸松則云松柏爲百木長梅則云百花魁黃鶯則云一名黃鸝一名倉庚鶯則云腐草化生蜻蜓則云六足四翼翅薄等類凡皆內地習見之物不煩細注今悉刪去以免載籍繁夥

一 舊附考中頗載僞鄭逸事以其始則驅逐荷蘭繼則納土歸降蓋爲我

朝先嚴者故附錄其興亡之跡以爲臺地之緣起非敢倣十國春秋之例也

一 臺郡初闢中士大夫至止者類各有著述以紀異然多散在四方島嶼固鮮藏書之府也范侍御奉

命巡方自京師携黃玉圃先生使檄錄以行至武林又得孫湘南先生赤嵌集抵臺商榷脩志於是臺灣志略靖海紀東征紀臺灣紀略臺灣雜記稗海紀遊諸集按藉搜索並得全書惟沈文開集向時寓臺諸公所覽稱而未得見者亦輾轉覓諸其後人凡得詩文雜作鈔本九卷半皆蠹爛但字迹猶可辨識既不忍沒前人之苦心故所徵引較前志尤多但志中所引僅註書名因特于雜記中另列雜著一條備載作者姓氏方知爲某人之書亦並以存海外之文章令後來有據耳

一 藝文內舊志將鄭氏歸降表採入尤爲不倫若前明寧靖王術桂係監國魯王所封傳中屢以王稱之亦非體矣又奏疏首尾體例全載此爲冊檔之式非是紀乘之文況題目已經列明更爲屋上架屋凡以上概爲刪改至蕩平鄭氏施靖海之功爲烈其後辛丑恢復則藍總戎之功不讓於施今二家記載之書一則有靖海紀一則有東征

記雖不必皆成于已手然其功足傳則其文亦多可錄志中祇選其半已各得一卷他如沈文開不忘羈旅之思孫湘南獨擅叢笑之什是以採擇尤多蓋是志于藝文之去取尤嚴也餘若詠物詠景之作則彙錄入本條下以見寫生屬情之妙其不關此者則統載藝文詩中云

註：本凡例原書五葉，內半葉空白；列載於首冊之中。每半葉十一行，每行廿二字；字大約一平方公分。

五、余文儀 續修臺灣府志

本書凡例內容與「范志」相同，刻版不同，字體略小，字大約六平方公厘。

以上各書所用板本與「臺灣府志序跋合校」一文相同。